

20232093648

СОБРАНИЕ НА РЕПУБЛИКА СЕВЕРНА МАКЕДОНИЈА

L I G J

PËR NDRYSHIMIN DHE PLOTËSIMIN E LIGJIT TË BANKËS ZHVILLIMORE TË MAQEDONISË SË VERIUT (*)

Neni 1

Në Ligjin e Bankës Zhvillimore të Maqedonisë së Veriut (“Gazeta Zyrtare e Republikës së Maqedonisë” nr. 105/2009 dhe “Gazeta Zyrtare e Republikës së Maqedonisë së Veriut” nr. 77/21) në nenin 10 paragrafi 1 në pikën 6) pas fjalës “projekte” shtohen fjalët “për efikasitet energjetik”.

Neni 2

Me nenin 11, paragrafi (4), fjalët “shfrytëzues buxhetorë dhe njësi shfrytëzuese të mjeteve nga Buxheti i Republikës së Maqedonisë së Veriut” zëvendësohen me fjalët “subjekte publike sipas Ligjit të Buxheteve”.

Pas paragrafit (4) shtohet paragrafi i ri (5) si më poshtë:

“(5) Me përjashtim të paragrafit (4) të këtij neni, BZHMV-ja aprovon kredi, emeton garanci dhe aprovon grante për subjektet publike nga mjetet e Fondit të Efikasitetit Energjetik”.

Neni 3

Në nenin 13, paragrafi (1), pika 2), lidhëza “dhe” në fund të fjalisë zëvendësohet me pikëpresje.

Në pikën 3), pika në fund të fjalisë zëvendësohet me lidhëzën “dhe” dhe shtohet pikë e re 4) si më poshtë:

“4) aprovon kredi, emeton garanci dhe aprovon grante nga mjetet e Fondit të Efikasitetit Energjetik”.

Pas paragrafit (3) shtohet paragrafi i ri (4) si më poshtë:

“(4) Qeveria e Republikës së Maqedonisë së Veriut dhe BZHMV-ja nënshkruajnë marrëveshje me ç’rast do të përcaktohen kushtet me të cilat do të aprovohen kreditë, emtohen garancitë dhe aprovohen grantet e paragrafit (1) pika 4) të këtij neni për të plotësuar qëllimet e efikasitetit energjetik në nivel të Republikës së Maqedonisë së Veriut sipas nenit 5 të Ligjit të Efikasitetit Energjetik (*).”.

Neni 4

Në nenin 13-c, paragrafi (9) ndryshohet si më poshtë:

“Mjetet e Fondit Garantues mund të vendosen në letra me vlerë të emetuara nga Republika e Maqedonisë së Veriut”.

Neni 5

Pas nenit 13-e shtohen katër nene të reja 13-ë, 13-f, 13-g dhe 13-gj si më poshtë:

“Neni 13-ë

Për përkrahje të zhvillimit përmes financimit direkt të efikasitetit energjetik, në BZHMV themelohet Fondi i Efikasitetit Energjetik si njësi e veçantë organizative.

* Me këtë ligj harmonizohet Direktiva 2012/27/BE e Parlamentit Europian dhe e Këshillit, datë 25 tetor 2012, për efikasitetin energjetik, për ndryshimin e Direktivave 2009/125/KE dhe 2010/30/BE dhe për shfuqizimin e Direktivave 2004/8/KE dhe 2006/32/KE (CÉLEX nr. 32012L0027).

Neni 13-f

(1) Mjetet e Fondit të Efikasitetit Energjetik sigurohen nga:

- 1) Buxheti i Republikës së Maqedonisë së Veriut si mjete të pakthyeshme;
- 2) hua dhe/ose linja kreditore nga institucionet financiare ndërkombëtare;
- 3) donacione nga vendi dhe jashtë tij;
- 4) të hyra nga interesi dhe provizionet për kreditë e aprovuara dhe garancitë e emetuara;
- 5) të hyra nga destinimet në letra me vlerë
- 6) të hyra nga zbatimi i skemës obligative për efikasitetin energjetik dhe
- 7) burime të tjera të financimit nëse janë përcaktuar me ligj të veçantë për plotësimin e qëllimeve të mbrojtjes së mjedisit jetësor dhe aksioneve klimatike.

(2) Qeveria e Republikës së Maqedonisë së Veriut mund të miratojë vendim për rritjen e vlerës së mjeteve të pakthyeshme të paragrafit (1), pika 1) të këtij neni.

(3) Mjetet e Fondit të Efikasitetit Energjetik nuk përfshihen në kapitalin e BZHMV-së dhe mund të shfrytëzohen vetëm për destinimet e përcaktuara në nenin 13-g të këtij neni.

(4) Ekspozimi i Fondit të Efikasitetit Energjetik nuk llogaritet në ekspozimet e nenit 14 të këtij ligji.

(5) Për punën me mjetet e Fondit të Efikasitetit Energjetik, BZHMV-ja hap llogari të veçantë të destinuar në Bankën Popullore të Republikës së Maqedonisë së Veriut.

(6) Për mjetet e Fondit të Efikasitetit Energjetik, BZHMV-ja mban evidencë të veçantë financiare kontabiliste.

(7) Mjetet e Fondit të Efikasitetit Energjetik mund të destinohen në letra me vlerë, të emetuara nga Republika e Maqedonisë së Veriut.

(8) Të hyrat nga interesi i mjeteve të destinuara të paragrafit (7) të këtij neni, paguhet në llogarinë e paragrafit (5) të këtij neni dhe janë pjesë përbërëse e mjeteve të pakthyeshme të siguruara nga Buxheti i Republikës së Maqedonisë së Veriut.

Neni 13-g

(1) Mjetet e Fondit të Efikasitetit Energjetik shfrytëzohen për financimin e investimeve në efikasitetin energjetik përmes aprovimit të kredive, emetimit të garancive dhe aprovimit të granteve.

(2) BZHMV-ja ka të drejtë që nga mjetet e Fondit të Efikasitetit Energjetik të arkëtojë provizione dhe kosto të tjera që rezultojnë nga puna e Fondit të Efikasitetit Energjetik në vlerë të përcaktuara me marrëveshjen e nenit 13, paragrafi (4) të këtij ligji.

(3) BZHMV-ja ka për detyrë që të ndërmarrë aktivitete lidhur me arkëtimin e kërkesave në bazë të kredive të aprovuara dhe garancive të emetuara nga Fondi i Efikasitetit Energjetik.

Neni 13-gj

(1) Për menaxhim të Fondit të Efikasitetit Energjetik, Qeveria e Republikës së Maqedonisë së Veriut merr vendim për themelimin e Komitetit të Efikasitetit Energjetik (në tekstin e mëtejshëm: Komiteti).

(2) Komiteti përbëhet prej pesë anëtarëve me mandat prej 6 vjetësh, me ç'rast njëri është kryetar:

- një anëtar me propozim të Ministrisë së Financave,
- një anëtar me propozim të Ministrisë së Ekonomisë,
- një anëtar me propozim të Ministrisë së Mjedisit Jetësor dhe të Planifikimit Hapësinor;
- një anëtar me propozim të Agjencisë së Energjetikës dhe
- një anëtar me propozim të BZHMV-së.

(3) Komiteti në mbledhjen e parë përzgjedh kryetarin nga anëtarët e paragrafit (2) të këtij neni.

(4) Anëtarët e Komitetit të paragrafit (2) të këtij neni duhet të kenë fituar paktën 240 kredi sipas SETK-së ose shkallë të përfunduar VII/1 në fushën e shkencave teknike – elektroteknikë, makineri ose ndërtimtari, shkencave ekonomike, shkencave të organizimit dhe menaxhimit (menaxhmenti) ose shkencave juridike dhe të paktën 10 vjet përvojë pune mbi punët dhe detyrat e punës relevante për punën e Fondit të Efikasitetit Energjetik në fushën e arsimit të lartë të përfunduar.

(5) Komiteti kryen aktivitetet e mëposhtme:

-Miraton planin trevjeçar për punën dhe funksionimin e Fondit të Efikasitetit Energjetik dhe qëndrueshmërisë së tij;

-Miraton planin vjetor të punës së Fondit të Efikasitetit Energjetik, për portofolin e Fondit me buxhet dhe shpenzime të vlerësuara të punës;

-Të paktën një herë në nivel vjetor, më së voni deri në fund të tremujorit të parë të vitit aktual kryen vlerësim të realizimit të planit vjetor të punës së Fondit të Efikasitetit Energjetik, për vitin paraprak;

-Vendosë për zhvillimin e produkteve aktuale dhe përcaktimin e produkteve të reja në kuadër të Fondit të Efikasitetit Energjetik;

-Miraton vendim për aprovimin e kredive, garancive dhe granteve nga mjetet e Fondit të Efikasitetit Energjetik;

-Miraton raport gjysmëvjetor për punën e Fondit të Efikasitetit Energjetik, duke përfshirë gjendjen më datë 30 qershor të vitit aktual, si dhe raport vjetor për punën e Fondit të Efikasitetit Energjetik, duke përfshirë gjendjen më datë 31 dhjetor të vitit aktual;

-Organizon bashkëpunim, konsultime dhe shkëmbim të informacioneve me fondet e tjera të efikasitetit energjetik dhe mjedisit jetësor në kuadër të Komunitetit Energjetik dhe Bashkimit Europian, si dhe bashkëpunim ndërinstytucional dhe rrjetizim, veçanërisht me institucionet, përfaqësuesit e të cilave janë anëtarë të Komitetit, me qëllim të realizimit më efikas të produkteve të Fondit të Efikasitetit Energjetik;

-Kujdeset për funksionimin e Fondit në periudhë afatshkurtër, afatmesme dhe afatgjatë;

-Miraton plane aksionale dhe raporte të monitorimit dhe kontrollit të realizimit të produkteve të Fondit të Efikasitetit Energjetik;

-Miraton procedura dhe udhëzime interne për punën e Fondit të Efikasitetit Energjetik;

-Parashtron raport në Ministrinë e Financave mbi vlerën e mjeteve të pakthyeshme që duhet të sigurohen nga Buxheti i Republikës së Maqedonisë së Veriut, me qëllim të plotësimit të mjeteve të pakthyeshme për realizimin e planeve vjetore me mjetet e Buxhetit të Republikës së Maqedonisë së Veriut”.

(6) Anëtarëve të Komitetit u paguhet kompensim për punën e kryer në nivel mujor, vlera e të cilit përcaktohet nga Qeveria e Republikës së Maqedonisë së Veriut dhe që duhet të jetë i arsyeshëm dhe përkatës sa i përket vëllimit dhe kompleksitetit të punës, por jo më i lartë se një pagë mesatare neto në Republikën e Maqedonisë së Veriut.

Neni 6

Në nenin 17, pas paragrafit (1) shtohet paragrafi i ri (2) si më poshtë:

“(2) Me përjashtim të paragrafit (1) të këtij neni me Statutin e BZHMV-së përcaktohet puna e Komitetit, si organ i BZHMV-së, ku nuk zbatohen dispozitat e Ligjit të Bankave”.

Paragrafët (2), (3), (4), (5) dhe (6) bëhen paragrafë (3), (4), (5), (6) dhe (7).

Neni 7

Pas nenit 18-a shtohet neni i ri 18-b si më poshtë:

“Neni 18-b

(1) BZHMV-ja më së voni deri më 30 qershor të vitit aktual në Qeverinë e Republikës së Maqedonisë së Veriut dorëzon raport vjetor për punën e Fondit të Efikasitetit Energjetik për vitin paraprak, ndërsa deri më 30 shtator të vitit aktual në Qeverinë e Republikës së Maqedonisë së Veriut dorëzon raport gjysmëvjetor për punën e Fondit të Efikasitetit Energjetik për vitin aktual.

(2) BZHMV-ja publikon vlerën e kredive të aprovuara, garancive të emetuara dhe granteve të aprovuara nga Fondi i Efikasitetit Energjetik në faqen e saj të internetit në nivel tremujor.

(3) Për kërkesat e Fondit të Efikasitetit Energjetik, që tejkalojnë vlerën e mjeteve të Fondit të Efikasitetit Energjetik, Ministria e Financave në Qeverinë e Republikës së Maqedonisë së Veriut parashtron Informacionin mbi nevojën e sigurimit të mjeteve shtesë nga Buxheti i Republikës së Maqedonisë së Veriut në bashkëngjitje me vendimin e propozuar, me ç’rast Qeveria e Republikës së Maqedonisë së Veriut miraton vendim për pagesë të mjeteve në Fondin e Efikasitetit Energjetik brenda 30 ditësh”.

Neni 8

Ky ligj hyn në fuqi tetë ditë pas botimit në Gazetën Zyrtare të Republikës së Maqedonisë së Veriut.